

Perché mée abandunàac

di Paolo Piani (dialetto di Albosaggia)

*Tüt de biànch lacàat,
sèmpre nèt e urdinàat,
posàvi ité 'ndèl cumidii,
gió 'nbas, deréet al spurtilli;*

*e sa, 'nvéci al me tucava laoràa,
sóta al léci' stavi tranquil a speciàa
fin ca òl sùul l'era ca levàat
e con l'acqua de la rógia vignivi lavàat!*

*Me presenti: sóo l'urinari,
reperibel ogni nòc', salvo straordinari!
fóo en servizi scrüpolos e riservàat:
mai da la mia buca 'na cùcola l'è scapàat!*

*Parchè nü urinari tüt me vedéva,
di nòs padrù tati róbi me conoséva:
li quistiù pusé intimi e delicadi,
a nü li podega ca vèss piacadi!*

*Me seva , saparsòrt!, chél ca i maiava,
a strangiù, ü sa i lè mastegava,
sa i stava en buna salùt ü miga tàat,
sa i stava en pàas ü sa ieva rognàat;*

*me capiva àa de li stagiù ogni pasac',
sa li vachi iéra süci ü li fava lac',
quant ca 'nde l' òrt l'era mariüuc' i zuchii,
ü quanda li patati ... ensema ai cudighii!*

*Ma nüu, de tut chél ca 'l succedeva,
uficialmènt niént me vedeva:
en silénsi me fava la nòsa misiù,
tuso en prèvet che ricéef la confesiù!*

*E adèss, dopo ca par mila e pusé agn
ma sempri fac' ol nòs dovéer senza lagn,
me sta abandunàac en mèz a la cunfusiù,
piée de ragnini, senza n'óngia de compasiù!*

*A pensàa ... da chél ca se sènt al telegiornàal ...
con tata géet che cupa, violènta e fa del màal,
... 'mbé ... a cérti crapi sènsa scervèl,
me podariss benissem fach da capèl!!!*